

laburrean

■ Kanarietako eta Euskal Herriko musika jaialdia ostiralean Tenerifen

KANARIAR UHARTEETAKO eta Euskal Herriko musikak nahastuko dituen jaialdi bat izango da heldu den ostiralean, Tenerifeko La Lagunan. Izan ere, Rogelio Botanz, Ruper Ordorika, Tapia eta Leturia, eta Soraluzeko Txistulari eta Dantzari taldea ariko dira. Rogelio Botanz legazpiarrak Kanarietako musika joko du Puntos Suspensivos taldearekin, eta Gaztelupeko Hotsak zigiluarekin argitaratu duen diskoko piezak kantatuko ditu. Ruper Ordorikak, berriz, laster kalean izango duen *Dabilen harria* disko berriko kantuak; eta Tapia eta Leturia bikoteak, azkenik, 1998 lana aurkeztuko du. X

■ Vitoria Arte Gazteiz lehiaketako 51 lan ikus daitezke Montehermoso kultur zentroan

GUZTIRA, 185 lan jaso dituzte Vitoria Arte Gazteiz lehiaketako antolatzaileek, eta haietako 51 lan ikusi ahal izango dira heldu den hilaren erdialdera arte Montehermoso kultur zentroan. Enrique Linaza, Elena Asins eta Imanol Marrodan artisten proiektuak saritu ditu aurreko Udalak, eta, erakusketarekin batera, sinposium bat eta hainbat tailer antolatu ditu. X

■ Gaur abiatuko da Poesiaren Trena, Nerudaren omenez

PABLO NERUDA txiletar poetaren heriotzaren 25 urteurrena dela eta, omenaldi ugari izango dira Txilen eta beste hainbat herritan. Poeta txiletarrak gaztaroa egin zuen Temuco herritik abiatuko da gaur Poesiaren Trena, eta idazle ugari eramango ditu kostaraino. Hainbat erakusketa eta hitzaldi izango dira egunotan, eta zenbait kantarik eta musika taldek disko bat grabatuko dute Pablo Nerudaren poemekin. X



Oteizaren lanen erakusketa atzo ireki zen eta urriaren 21a arte egongo da zabalik.

XOUSE SIMAL

Oteizaren eskulturak eta akuaforteak Bilboko Windsor Kulturgintza galerian

Datorren hilean 90 urte beteko dituen artistari gorazarre egin nahi diote horrela

Urriaren 21ean beteko ditu Jorge Oteizak 90 urte. Artista handiari gorazarre egiteko asmoarekin, haren hainbat lan bildu ditu Bilboko Windsor Kulturgintza galeriak. *La Ley de los Cambios* liburu-karpetak biltzen dituen akuaforteak eta zazpi eskultura heldu den urriaren 24a arte egongo dira ikusgai aipatu aretoan. «Ibilbide artistiko zabalaren lagin txiki bat dira lanok», diote antolatzaileek.

Montse Arregi / Bilbo

ATZO iluntzean inauguratu zuten Bilboko Windsor Kulturgintza galerian (Juan Ajuriagerra, 14) Jorge Oteizaren lanen erakusketa. Zazpi eskultura eta oriotarraren lan grafiko bakarra biltzen duen *La Ley de los Cambios* (Aldaketan Legea) liburu-karpeta bildu ditu aretoak urriaren 24a arte zabalik izango den erakusketarako.

Oteizak 90 urte beteko dituela eta, «omenaldi txiki bat» egitea otu zitzaion Windsor Kulturgintzako arduradun Roberto Saenz de Gorbeari. Izan ere, datorren

urriaren 21ean izango da oriotarraren urtebetetzea. «Haren pertsonari eta lanari diedan mirespena izan dira erakustaldiaren abiapuntua», azpimarratu du galeriako buruak.

Erakusketan diren eskulturen artean Arantzazuko garaitik aurrerako lanak daude, besteak beste *La Desocupación de la Esfera*; *Maclas*; *Cajas Vacías* edota *Cajas Abiertas*, gehienak hutsaren estetikaren inguruan Oteizak landu zuen esperimentazio ildoaren emaitza. Marmola, harria, burdina eta brontzea erabili zituen artistak eskulturotan.

Euskal artistarik unibertsale-

nak bere ibilbidean zehar egindako lan grafiko bakarra ere erakusketan da. *La Ley de los Cambios* liburu-karpeta 1991. urtean argitaratu zuen Oteizak, eta bederatzi akuafortez gain bere obra artistikoaren gainean egindako hausnarketaren ondoriozko testuak ere biltzen ditu. Argitalpen hartatik 45 ale atera ziren, eta baita suite bat ere, grabatu bakoitzaren 25 ale zituena.

Hainbat lan salgai dira • Lagunen bildumetatik elkartu ditu Saenz de Gorbeak erakusketako lanak. Grabatuen karpeta eta zenbait eskultura, gainera, salgai daude.

Erakustaldia osatzen duten eskultura eta grabatuak «artista oriotarraren ibilbide artistiko zabalaren lagin txiki bat» direla adierazi du Windsor Kulturgintza galeriako arduradunak. Erakusketako antolatzaileak nabarmendu duenez, «sortzaile handiaren lan plastikoaren garapena bederen zati batean ikusteaz gain,

bisitariak haren pentsamenduren bilakaeraren lagina ere izango du eskura».

Artistaren 90. urtebetetzearen karietara hainbat ekitaldi antolatuko direla espero du Saenz de Gorbeak. Oraindik ez da inolako erakusketa edo omenaldiren iragarpenik egin, baina Windsor Kulturgintza galeriako arduradunaren ustez «ez da halakorik faltako».

Windsor Kulturgintza aretoko buruak «artista eta pertsona moduan» miresten du Oteiza. «Hala ere, lagun minak garelaz ezin dut esan. Noizean behin elkartzen gara, baina ez daukagu harreman sakonik». Azkenengoz duela bizpahiru hilabete egon zen Saenz de Gorbea Orioko artistarekin.

Beste artista baten 90. urteurrena ere ospatzekotan da Windsor Kulturgintza galeria: Leadre Cristyfol eskultore katalanarena, alegia. Datorren otsailean egitekoa da erakusketa. X

IRAGARKI MERKEAK

(943) 300222

31 x 33 mm

31 x 33 mm
MODULO
(Iparralde)

Eguna: 85 l.
Astea (6 egun): 80 l.
2 aste (12 egun): 67 l.
Hilabetea (24 egun): 53 l.

Igeriketa
Monitore bat
behar da,
Arteleku Igeri
Elkartean
(Irun).

943 49 06 34
(Alvaro)

JAITSIERAK
GERNIKAKO ITSASADARREAN

URDAIBAI 989 70 87 69

Titiriteroak

Antzerkia
Zirko tailerrak
Ekintzak

907772347

Eskulangintzarako
irakaskuntza
zentroa

○ Grabaketa
kalkografikoa
○ Zeramika
○ Harlantzak
○ Zurlantzak
○ Brontze Galda
Derrigorrezkoa:
Arte Historia
Margoketa
**Prestakuntzaren
epea:**
3 urte, gutxienez
adina 16 urte

Informazioa:

Tel. 943 19 18 04 - DEBA



LEGAZPI 6
EUSKALTEGIA

98/99 IKASTURTEA

• EUSKALDUNTZEA
• ALFABETATZEA
• GOI-URRATSAK
• SAKONTZEA
• IKASTARO BEREZIAK
• AUTOIKASKETA-PROGRAMAK
• TUTORETZA ZERBITZUA

Matrikula zaitetz!

Lasala enparantza, 3 • Donostia • Tel. 943 42 43 66
IRALE PROGRAMA / HABEren dirulaguntzaz